

29/01/1997

BBMB taja kerusi penyelidikan

Kadir Dikoh

BANK Bumiputra Malaysia Berhad (BBMB) menaja kerusi untuk penyelidikan dan akademik mengenai "Perbankan dan Kewangan" di Universiti Utara Malaysia (UUM) bernilai RM2.5 juta.

Antara bidang penyelidikan ialah aliran dan pembangunan dalam perbankan negara, kesan dasar kewangan dan fiskal terhadap bank, pengaliran tabung analisis, perbankan luar pantai serta prospek mengenai kemajuan perbankan Islam.

Timbalan Pengurus Besar Pusatputra iaitu pusat latihan BBMB, A Bakar Sulaiman, berkata pihaknya dan UUM akan menandatangani perjanjian bagi tujuan itu Khamis ini yang dijangka turut disaksikan Perdana Menteri Datuk Seri Dr Mahathir Mohamad dan Pengerusi BBMB, Tan Sri Dr Abdul Khalid Sahan.

Katanya, upacara itu akan diadakan di Dewan Senat, UUM di Sintok, Kedah. Perjanjian itu akan ditandatangani di antara Ketua Pegawai Eksekutif merangkap Pengarah Eksekutif BBMB, Datuk Abdul Aziz Othman dan Naib Canselor UUM, Datuk Dr Shamsuddin Kassim.

"Setelah perjanjian itu dimeterai, maka pihak UUM akan mencari penghuni kerusi ini yang akan bertaraf Profesor BBMB mengenai perbankan dan kewangan di universiti itu.

"Fungsinya ialah untuk menjalankan penyelidikan, pengajaran dan pengawasan calon ijazah lanjutan. Penghuni kerusi ini akan dilantik dari kalangan penyelidik yang berkaliber di peringkat antarabangsa terutama dalam bidang pengurusan, kewangan atau ekonomi," katanya di Kuala Lumpur semalam.

Bakal penghuni kerusi itu buat masa ini adalah dijangka sudah memegang kedudukan penyelidik atau profesional yang kanan di universiti yang menjalankan penyelidikan.

Katanya, dengan peruntukan serta penubuhan kerusi itu, matlamat BBMB untuk kemajuan pendidikan melalui promosi kajian perbankan dan kewangan di Malaysia, akan dicapai.

A Bakar berkata, ia adalah kerusi pertama ditaja oleh BBMB di pusat pengajian tinggi dan kerusi kajian perbankan dan kewangan yang pertama di UUM.

Katanya, negara ini mengalami pertumbuhan ekonomi pesat dan diiktiraf sebagai sebuah negara kuasa ekonomi di Asia Tenggara.

"Kemajuan ini dapat dikekalkan dan antara penyumbang ke arah itu ialah sistem perbankan yang meningkatkan kemajuan kegiatan menabung dan melabur. Oleh itu, adalah perlu untuk meningkatkan lagi kegiatan penyelidikan dan latihan dalam perbankan dan kewangan," katanya.

(END)